

Namminersorlutik Oqartussat Missingersuutitut Naatsorsuusianullu siunnersuisoqatigiinnut suleriaasiat pillugu nalunaarutaat nr. 4, 6. juni 2019-imeersoq

Kommunit aamma Namminersorlutik Oqartussat missingersuutaat naatsorsuutaallu pillugit Inatsisartut inatsisaat nr. 26, 28. november 2016-imeersumi § 34, imm. 3, § 36 aamma § 45, imm. 2 naapertorlugu, aalajangersarneqarpoq:

Kapitali 1

Missingersuutitut Naatsorsuutinullu siunnersuisoqatigiit aaqqissuussaannerat

§ 1. Missingersuutitut Naatsorsuutinullu siunnersuisoqatigiit tassaapput kommunit tamarmik immikkut sulisoq 1 toqqaqaat, kommunit aningaasaqarnikkut pissusiinik annertuumik ilisimasaqartoq, sulisoq 1, Aningaasaqarnermut Naalakkersuisumit toqqarneqartoq, Kalaallit Nunaata aningaasaqarneranik annertuumik ilisimasaqartoq siunnersuisoqatigiinnilu siulittaasuusoq, aamma Namminersorlutik Oqartussani naatsorsuuserinermut pisortaq.

Imm. 2. Missingersuutitut Naatsorsuusianullu siunnersuisoqatigiit akuersaarsinnaavaa siunnersuisoqatigiit ataatsimiittarneranni ataatsimeeqataasartussaataasumik peqataasoqartarnissaa. Peqataasartussaataasut oqaaseqarsinnaatitaapput, kisiannili taaseqataasinnaanatik.

§ 2. Aningaasaqarnermut Naalakkersuisoqarfiup Missingersuutitut Naatsorsuutinullu siunnersuisoqatigiit allattoqarfia isumagissavaa.

§ 3. Kommunit aamma Naalakkersuisut Missingersuutitut Naatsorsuutinullu siunnersuisoqatigiinni ilaasortaatitamik sulinerannut namminneq aningaasartuutitik akilertassavaat.

Kapitali 2

Missingersuutitut Naatsorsuutinullu siunnersuisoqatigiit suliaasaat ataatsimiittarnissaallu

§ 4. Missingersuutitut Naatsorsuutinullu siunnersuisoqatigiit missingersuutit naatsorsuutillu pillugit pisortatigoortumik ataatsimut soqutigisaat pillugit apeqqutini ilitsersuisuusassapput siunnersuisassallutillu.

Imm. 2. Missingersuutitut Naatsorsuutinullu siunnersuisoqatigiit pisortanut kontonut pilersaarutit aamma kontolersuineranut ilitsersuutit pillugit aalajangersakkanik aalajangiisinnaapput. Missingersuutitut Naatsorsuutinullu siunnersuisoqatigiit matumani nalunaarsuisarnermi ataatsimut atugassarititaasut aalajangersorsinnaavaat aamma paasissutissat kisitsisillu pingarnerit taakkununga tunngasut nalunaarsuinermi atugassat nalunaarsorneqarneranni ataatsimut ilitsersuusiata akuersissutigisinnaallugit.

§ 5. Missingersuutitut Naatsorsuutitullu siunnersuisoqatigiit kommuninut aamma Namminersorlutik Oqartussanut inassutigisinnaavaat ukiut ataatsip arlallilluunniit ingerlaneranni susassaqrarfiit erseqqinnerusumik aalajangersarneqarsimasut ataaseq arlallilluunniit pillugit aqutsinikkut kukkunersiorneqassasut.

§ 6. Missingersuutitut Naatsorsuutitullu siunnersuisoqatigiit piffissat sumilu ataatsimiittarnissat namminneq aalajangersorsinnaavaat. Allattoqarfik siunnersuisoqatigiinnut ataatsimiigiaqqusisassaaq kingusinnerpaamik ataatsimiinnissaq sapaatip akunneranik sioqqullugu.

Imm. 2. Oqaluuserisassatut siunnersuutit aamma allakkatigut atortussat Missingersuutitut Naatsorsuutitullu siunnersuisoqatigiit oqaluuserinninnissaannut pisariaqartinneqartut siunnersuisoqatigiit allattoqarfiannut nassiuuneqartassapput ataatsimiinnissaq kingusinnerpaamik sapaatit akunnerini marluk sioqqullugu. Missingersuutitut Naatsorsuutitullu siunnersuisoqatigiit siulittaasuata tamatumunnga immikkut ittunik pissutissaqartillugu ulloq killiliussap allannguuteqarnissaa immikkut ittumik akuersissutigisinnaavaa.

§ 7. Missingersuutitut Naatsorsuutitullu siunnersuisoqatigiit siulittaasuata siunnersuisoqatigiit suliassaat pilersaarusiortassavai siunnersuisoqatigiillu ataatsimiittarnerini oqallinnerit siulersortassallugit.

§ 8. Missingersuutitut Naatsorsuutitullu siunnersuisoqatigiit aalajangiisinnaassuseqarput ilaasortat affaat sinnerlugit najuuppata.

Imm. 2. Taassisut nalinginnaasumik amerlanerussuteqarnerisigut aalajangiisoqartassaaq. Taasinerit naligiippata siulittaasup taasina aalajangiisuusassaaq.

Imm. 3. Suliassat kinguartinneqarnissaannik utaqqissunneqarsinnaangippata siunnersuisoqatigiit sinnerlugit siulittaasoq aalajangiisinnaavoq, ilaasortat allat ataatsimiigiaqqunissat ajornavissappat.

Imm. 4. Imm. 3 malillugu aalajangersimasaa pillugu Missingersuutitut Naatsorsuutitullu siunnersuisoqatigiit piaartumik ilisimatinneqassapput.

§ 9. Missingersuutitut Naatsorsuutitullu siunnersuisoqatigiit siulittaasuata nakkutigissavaa, siunnersuisoqatigiit oqallinneri aalajangiinerilu pillugit imaqarniliorqartarnissaa.

Imm. 2. Ilaasortaq aalajangiinermut isumaqataanngitsoq piginnaatitaavoq isummami imaqarniliamut allatsissallugu. Ilaasortaq ataaseq aalajangiinermut isumaqataangippat, tamanna aalajangiinerimi allassimassaaq.

Imm. 3. Imaqarniliatut missingiut ilaasortat akuerisassaat siulittaasumut saqqummiutereerneratigut allattoqarfiup ilaasortanut nassiuutissavaa.

Imm. 4. Imaqarniliaq akuerineqartutut naatsorsuunneqartassaaq, nassiuutereerneranit sapaatip akunneri 2-t qaangiutsinnagit missingiummut akerliliinerit tiguneqarsimangippata.

Imm. 5. Imaqarniliamut akerliliinerit takkuppata, taakku kingusinnerpaamik ataatsimiinnissap tulliani oqaluuserineqassapput.

Kapitali 3

Atuutilerfia

§ 10. Nalunaarut ulloq 15. juni 2019 atuutilerpoq.

Namminersorlutik Oqartussat, ulloq 6. juni 2019

Vittus Qujaukitsoq

/

Nikolai S. Christensen